

宛陵先生集

開化圖書館  
kaizhua library

開化圖書館

Kaichua library

開化圖書館

Kaichua library

開化圖書館

Kaichua library

宛陵先生集目錄卷第十五

觀何君寶畫

送任太博歸省

送張學士知洪州

觀楊之美畫

李審言遺酒

送邵郎中知潭州

送楊叔恬

送洪州倅何太博

見賣瓠者

和鄰幾景德避暑

送趙諫議知徐州

送邵戶曹隨侍

哭韓舍人五首

高平公挽歌三首

歐陽郡太君挽歌

和石昌言求筆

邃隱堂

讀末叔撰薛雲衢碣

和昌言蜀牋答松管

送楊叔武廣南招安

走筆戲邵興宗  
送李中舍宰南鄭

送王察推之鄧州  
戲酬高負外鯽魚

送何學士知漢州  
和達觀師聞蟬

和杜相公謝蔡君謨茶

和接花  
送石昌言學士

書南事  
送吳都官還江南

馮子都詩

并序

赴庾直有懷

采芡

史氏南軒

送陳脩撰

和寄宣州廣教文鑒師

送陸學士泰州倅

送徐祕丞知梁州軍

和秋夕對月

目錄終

開化圖書館  
kuahua library

宛陵先生集卷第十五

宋宛陵梅堯臣聖俞著

觀何君寶畫

燕馬易畫吳牛難圖馬骨隱細牛骨麤馬毛要  
密牛毛踈麤踈必辨別細密多模胡乃知戴嵩  
筆能出韓幹徒幹馬精神在韁勒嵩牛怒鬪無  
牽拘昨日何家觀小軸絹雖破爛色不渝二頭  
相觸角競掎前脚如跪後脚舒尾株榻直脊脊  
蹙筋力寫盡蹄腕殊一勝一敗又苦似勝者狼

逐敗者趨卷窮赤印置小字置字乃是陶尚書  
尚書國初人愛畫收幾厨買時不惜金與帛帛  
載羊車錢載驢後世兒孫不能保賣人窮市無  
須史凡目矜新不重故千錢酬直皆咲愚四牛  
遂爲何氏有裝背入眼天下無坐中吾儕趣已  
異又喜玄女傳兵符此本實稱閻令畫下筆簡  
細容顏姝三人鬼狀一牛首八女二十美丈夫  
黃帝中間蔭葩蓋霞扇錯玳旌擁朱冠服難知  
歲月遠但見儀衛森清都復觀鹿臺獨夫受妲

已不笑何由娛酒池肉林騎行狗剖心斫脛堪  
悲吁數幅吳王宴西子綵舟張樂當姑蘇宮娥  
數百簇高下鬢髻一一紅芙蓉危峰細浪得平  
遠前對洞庭傍大湖商紂夫差可垂誠歷世傳  
玩叅盤盃鷗鷹草木不足記特詠此事心何如

送任太博歸省西都

人言少保持家謹載見西京萬石君子舍今歸  
浣裙切里門重戒下車勤田園一一能爲計僮  
僕訢訢亦有聞我負洛陽山水久試因行色寄

嵩雲

送少卿張學士知洪州

朱旗畫舸一百尺五月長江水拍天穩去先應  
望廬岳暫來誰復見龍泉閣經吏部重爲記山  
識吳王舊鑄錢往迹可尋軍士少贖書遺逸附  
青編

觀楊之美畫

天官乘車建朱旗赤旛前亞風卷披二龍緩駕  
蒼髯垂印箱傍挈文籍隨雙驂推輓如畏遲行

從冠服多威儀水官自有真龍騎兩佐並跨鯨  
尾螭步趨羣吏怪眼眉雲生海面無端滉雷部  
處上相與期人身獸爪負鼓馳後有同類挾且  
搥次執電鏡風囊吹青虵有角魚足鬣上下引  
導神所施地官旣失不可知此畫傳是閻令爲  
設色鮮潤筆法竒絹理膩滑雞子皮吳生龍王  
多裂隳八軸展玩忘晨炊李成山水曉景移黃  
荃花竹雀擁枝韓幹馬本摸搭時神駿都失存  
毫釐日高腹枵眼背眵邂逅獲見何言疲厚謝

主翁意不衰他日飽目看無遺

李審言遺酒

大梁美酒斗千錢欲飲常被饑窘煎經時一滴  
不入口漱齒費盡華池泉昨日靈昌兵吏至跪  
壺曾不候報箋赤泥坼封傾瓦盎母妻共嘗婢  
流涎隣家葡萄未結子引蔓垂過高墻巔當街  
賣杏已黃熟獨堆百顆充盤筵老年牙踈不喜  
肉况乃下箸無腥膻空腸易醉忽酪酊倒頭夢  
到上帝前賜臣蒼龍跨入月不意正值姮娥眠

無人采顧傍玉兔便取作腊下九天拔毛爲筆  
筆如椽狂吟一掃一百篇其間長句寄東郡東  
郡太守終始賢切莫汲竭滑公并留釀此醕時  
我傳

送邵郎中知潭州

張鏡疊吹洞庭外綠虎帶刀蠻帥迎且諭漢家  
綏撫厚莫言湘守事權輕木奴洲近霜包熟斑  
竹林昏野鳥鳴賈誼宅邊寒井在暫留千騎漱  
餘清

送楊叔恬應北京辟

昔時見子宛丘下丞相待子知子賢子於文字  
實廣博海客謾估珠盈船欲賣明月一寸魄雖  
豪未有售以錢通都大邑忽辨寶直取不犯驪  
龍涎遂作照乘物矜夸魏人前從茲十二車光  
彩生從先

送洪州通判何太博若谷先歸新淦

拜官江上客乘馬不乘船獨畏蛟龍浪將歸風  
雨天葛花侵野徑源水入腴田君住巴丘下西

山道路連

五月七日見賣瓠者

老圃奪天時馬通爲煦嫗四月彼種瓜五月此  
賣瓠陽陂與糞壤功力且異趣瓜遲瓠何早豈  
不同雨露速利乃在人爭先無晚暮

和江鄰幾景德寺避暑

埳蟻不應雨鳴鳶不生風鬱氣若甑炊初陽如  
火紅皴膚汗交流脂體膏將鎔龍頭費挹酌犢  
鼻強遮蒙常畏俗物來去避青蓮宮廣堂鋪琉

璃高簷蔭梧桐廊壁畫地獄獄具鑊鋸舂鐵城  
何焰焰鐵床亦彤彤誰知炮烙死活間傳自西  
域黃面翁正類人世苦此熱聲利役使亡西東  
京師貴貨幾椽舍窮煎相似聒欲聳屋頭朝爨  
作飲食枕底夕艾驅蚊蟲宜爾近巷江夫子賦  
詩特壓塵土中

送趙諫議知徐州

及

鹿車幾兩馬幾匹軫建朱幡騎轂弓雨過短亭  
雲斷續鶯啼高柳路西東呂梁水注千尋險大

澤龍歸萬古空莫問前朝張僕射  
毬場細草綠  
蒙蒙

送邵戶曹隨侍之長沙

青袍會稽掾采服湘江行  
水館魚方美犀舟枕  
自清鷓鴣啼欲雨  
蟬竦見還晴風土雖卑濕  
醇醪可養生

晨起裴吳二直講過門云鳳閣韓舍人  
物故作五章以哭之

平生交友淚又哭  
寢門前魯叟不言命  
楚人空

問天月沉滄海底星隕太微邊莫怪終埋沒文章自可傳

使虜嘗專對江湖謫幾年始看還近侍遽此隔重泉沃酒酒空滿託詞詞謾傳視予猶手足莫怪獨潛然

算數曾無據仁人亦莫聞狠愚多至老蘭桂苦先焚不竟千秋恨還如萬里分臨風一號慟易散日邊雲

昔時賓宴地今見總幃遮棲室那因鵬從盃不

為蛇曾無越人術竟起漢臣嗟明日東城陌悲涼後部笳

曉陌行車過交相歎且驚荀龍聞一蛭穆駿失全鳴不復中書直空餘左史成緒言猶在耳尚想見平生

聞高平公殂謝述哀感舊以助挽歌三首

文章與功業有志不能成嘗以躋高位終然屈大名遺風猶可見逝水更無情歸卜青烏壠韓

城苦霧平

京洛同逃酒單袍跨馬歸明朝各相笑此分不  
爲稀公旣叅鑪冶予將事蕝薇悲哀無以報有  
涕向風揮

一出屢更郡人皆望酒壺俗情難可學奏記向  
來無貧賤常甘分崇高不解諛雖然門館隔泣  
與衆人俱

歐陽郡太君挽歌二首

夫人有賢子往歲謫夷陵欲使無愁鬱怡然見

寢興外詞陽磊磊內畏實兢兢濟壽復終貴共  
爲時所稱

當時丈人歿雖少守孤兒以及成名譽何嘗厭  
蒺藜暮年終饗福陰隲不應欺莫使碧江上獨  
傳陶母碑

依韻和石昌言學士求鼠鬚筆之什鼠  
鬚鼠尾者前遺君謨今以松管代贈

江南飛鼠拔長尾勁健頗勝中山毫其間又有  
蒼鼠鬚入用不數南雞毛二物緩急豈常獲捕

刺徒爾操蠻刀舊藏已贈蔡夫子報君松管何  
蕭騷

邃隱堂

大梁車馬地塵土飛百尺賢愚走其間朝暮不  
見迹北望天波門垣垣宗室宅宗室令王孫愛  
書輕玉帛華宇何深沉但聞列圖籍曲房有窈  
窕空自事眉額體胖生粹和安石處巖石古來  
爲善樂豈以歌鍾適

讀求叔所撰薛雲衛碣

文章如塗金光彩發美器所宜玉石間模寫傳  
千祀堅堅孝子心森森栢庭闕豈與石麒麟原  
傍鬪蒼翠

和石昌言以蜀牋南牋答松管之什

蠻牋抽轉龍鱗細秋兔束毫雞距尖楊子校經  
聊以贈蜀麻江楮報何嫌

赤蟻辭送楊叔武廣南招安

南方赤蟻大若象潛荒穴洞人莫逢天公合雨  
不決雨從橫亂出將自封侵壘凌壤壞城市戰

鬪億倍南柯雄嘗聞穿山食此物此物既大非常凶張舌流涎莫可餌枉啄不怕長戈春今令智者以智取卽見蟻醢傳太宮因而使知禍福理天子下令雲從龍

走筆戲邵興宗

子魚一尾不曾有又諾毗陵蒼鼠毫細粒吳粳誰下咽尖頭越管底能操

送李中舍襲之宰南鄭

莫問襄中道路難襄陽直上幾重灘蒼煙古栢

漢高廟落日荒茅韓信壇出水槎頭一絲挂穿  
虹雨脚兩橋殘土風大抵如南國期會先時俗  
自安

送王察推縝之鄧州

昔向南陽憶洛陽秋橙初熟半林黃車過白水  
沙痕濶鴈落鉗盧稻穰長廢壘漢碑金刻字古  
原秦冢石爲羊太平羽檄何曾有賓主相歡菊  
薦觴

戲酬高負外鯽魚

天池鯽魚長一尺鱗光鬣動楊枝磔西城隱吏  
江東客晝日馳來奪炎赫冷氣射屋汗收額便  
教斫膾傾大白我所共樂仲與伯羨君赴約笑  
啞啞持扇已見飛鸞翮欲往從之雲霧隔

送何濟川學士知漢州

丞相初得君有志重儒術乃言天下士徒此占  
清秩遂懲銜鬻人忝冒十八七進君天祿閣此  
衆爲第一又薦王張韓恬可與君匹吾儕宜慙  
羞空自預朝鞞欲歸無田園強住枉歲日值君

乘高軒西望函谷出當時迎長卿書史傳未悉  
車馳及襁負千萬今可詰老農喜君來田租不  
妄率織婦喜君來練機當俟畢府胥喜君來督  
責去暴扶疾苦無不求前人唯法律畫錦榮旣  
浮康民美方溢真爲丈夫志豈是名過實

依韻和達觀師聞蟬

飲餘晨露吸餘風噪遍高枝爲俗聾欲比伯夷  
清已甚不餐周粟腹常空

依韻和杜相公謝蔡君謨寄茶

天子歲嘗龍焙茶茶官催摘雨前茅團香已入  
中都府闔品爭傳太傅家小石冷泉留早味紫  
泥新品泛春華吳中內史才多少從此純羹不  
足誇

依韻和接花

唯是圃人巧非關元化偏折條違物理遷艷得  
花權美女嫁寒婿醜株生極妍世間多妄合吾  
不謂之然

送石昌言學士

混混拍堤瓜蔓水軒軒銜尾挂檣船使君東下  
只朝夕父老走迎無後先古堞秋耕拾銅鏃長  
淮瀑雨入壕蓮鳴猿舞鶴仍持去不憶承明夜  
直眠

書南事

大梁國南門驛騎方騰趨波波一何急蠻寇圍  
番禺番禺本無備前賴魏大夫大夫築子城今  
得守以須兵雖不滿萬閉壁堪指呼老幼轉木  
石壯健操矛弧廩庫得以完日月不易圖城中

舊無井魏鑿安鞭韃魏由飛語去不使立外郭  
古稱時有待淺薄皆謂紆曲突與爛額看取報  
功殊

送吳照鄰都官還江南

霜前江水磨碧銅岸背菱葉翹赤蟲吳郎鬢絲  
蒼幾縷不差月上扶桑東羞見清波照人影去  
時黑髮吹春風五年歸來婦應喜從此不問西  
飛鴻

馮子都詩 并序

漢霍光愛幸監奴馮子都與梁冀嬖奴秦宮事  
相對唐李賀作秦宮長辭亦云子都當時已有  
詩予因補之

黃金畫車屋韋絮綠車輪牽以五采絲藉以刺  
繡茵出入長信宮晝夜將誰親所親美且少玉  
頰丹砂脣殷羅縫輕襦明珠攢緇巾半醉卧車  
中侍婢躡行塵憶昔廣明亭將軍愛憐頻便房  
不使殉易寵在茲辰嗣侯喜驅逐平樂多從賓  
青絲穿五銖累室貯百珍歡與子都異矯與子

都均用財糞土擲吐氣日月跋天地可齊久禍  
患豈有因秋風茂陵下蒼蘚上騏驎

七月十六日赴庾直有懷

白日落我前明月隨我後流光如有情徘徊上  
高柳高柳對寢亭風影亂踈牖我馬卧其傍我  
僕倦攣肘寂寂重門扃獨念家中婦乳下兩小  
兒夜夜啼向母問爺若箇邊天性已見厚不嗟  
羈枕孤不愧棲禽偶內有子相憶外有月相守  
何似長征人沙塵聽刁斗

采芡

蝟毛蒼蒼磔不死銅盤轟轟釘頭生吳雞鬪敗  
絳幘碎海蚌吐出真珠明磨沙漉水葶殼滑斫  
桂煮釜風波聲齒如編貝嚼明月曼倩不復饑  
腸鳴莫論一斛貴與賤堂上狼籍無由行

史氏南軒

庭中碧玉盞上結三重山飛光入酒盃舞翠生  
髻鬟竹林眠黃麀莎徑欠白鷗主人無倦情窻  
戶不須關

送河北轉運使陳脩撰學士

河隍多宿兵兵食固所須幸時不戰鬪畜養安  
可無古興十萬師七十萬家輟耕鋤今來歲調  
餉且與往昔殊不使民轉輓但使民歸租急緩  
實塞下商賈以利趨關西河東亦如此軍食雖  
足民實虛公乎抱長才當有所畫謨應不貸內  
府重錦象牙明月珠邊城預自足寧待臨帑輸  
莫令稱庭臣爲言桑大夫

奉和寄宣州廣教文鑒師

秋池對門蓮子枯野壁剥月蝸涎塗庭中兩株  
古楠樹上有山鳥長相呼當時聯巢接飛者一  
落梁宋一海隅扶桑日枝幾千尺光彩不獨生  
陽鳥

送陸介夫學士通判泰州

從來戎馬地饗士日椎牛介胄奉儒服詩書叅  
將謀隴雲連塞起渭水入關流豈似瀛洲下窮  
年事校讎

送徐君章秘丞知梁州軍

蒼壁束江流孤軍水上頭蛟龍驚鼓角雲霧裊  
衣裘午市巴姑集危灘楚客愁使君才筆健當  
似白忠州

依韻和秋夜對月

陳王苑裏望空虛吳客風前憶具區橫閣漸看  
河影轉繞枝還見鵲驚無蟲催織婦機成素露  
逼鮫人淚作珠才比陶潛無用處紗巾時任酒  
沾濡

宛陵先生集卷第十五

宛陵先生集目錄卷第十六

和曹光道風拔檜  
飲劉原甫家

送監押曹供奉  
答仲源遺酒

送張生還和州  
李少傅夫人挽詞

送韓寺丞宰蕭山  
蔡君謨示弩牙

和原甫省中新菊  
和仲源獨夜吟

寄題琨瑤洞  
許生南歸

得榘棹戲酬  
寄題杭州法喜堂

題滿僧錄西明軒  
寄題撫州息心亭

送李太博

送道損司門

送雪竇穎長老

送襄邑杜太博

送晉原喬主簿

病後宿舍

閔尚衣盜袴

胡夫人挽歌

裴直講遺鹹豉

贈答如晦水梨

送樂職方知泗州

和劉原甫試墨

喜雪

送劉職方知汾州

雪後晚過天漢橋

送崔殿丞知廬州

見水牛拽車

吳太博遺柑子

和普公東園十題

開化園書  
Wakhuwa library

目錄終

開化圖書館  
Kaikwa Library

宛陵先生集卷第十六

宋宛陵梅堯臣聖俞著

和曹光道風拔三檜

飄風西北至樹苦萬絳牽君家三古檜繁根龍  
地纏其固謂不拔朱欄擁青塼今同秀林木摧  
倒誰復憐安得百力士扶持尚可全慎勿伐作  
薪豈無庭燎然

飲劉原甫家原甫懷二古錢勸酒其一  
齊之大刀長五寸半其一王莽時金錯

刀長二寸半

主人勸客飲勸客無天妍欲出古時物先請射  
以年我料孔子履又化武庫煙固知陶氏梭飛  
朱風雨天世無軒轅鏡百怪爭後先復聞豐城  
劍已入平津淵聊儺二百載儻有書畫傳嗚呼  
纔十一便可傾舫船探懷發二寶太公新室錢  
獨行齊大刀鑱形末環連文存半辨齊背有模  
法圓次觀金錯刀一刀平五千其文如此精銅不蠹  
蝕肉好鉤婉全爲君舉酒盡跨馬月娟娟

送嘉州監押曹供奉

測

舊友尹師魯嘗作送子文文存人已歿行復我  
何云平時爲郡尉遐方宜撫軍定過揚雄宅野  
鶴自成羣

答仲源太傅八日遺酒

陶潛九月九無酒望白衣何言先一日雙榼忽  
我歸借問遺酒誰天宗分日暉明當酌大斗黃  
菊羔醅肥李賀諸王孫作詩字欲飛聞多錦囊  
句將報慙才微

送張生還和州

山頭孤石望來久  
天外行人今獨歸  
藥囊自有留生術  
不管淮南木葉飛

李康靖少傅夫人挽詞二首

九月秋風急  
三川苦霧迷  
卜邨新隧啓  
度輦短簫齊  
寶劍知終合  
靈蟾已殞西  
松門來會葬  
車馬幾千蹄

板輿曾至鄭靈輅  
此歸周行哭人增  
慕凝笳月正秋  
九原開祔穴  
故土覆新丘  
歲晏寒松下  
茅

苦孝子留

送韓文饒寺丞宰蕭山

吳會未探冗廣陵先看潮橫江百馬怒卷海萬  
顰囂舟楫凌湍發魚龍接浪跳薄言增勇氣少  
當舉山瓢

蔡君謨示古大弩牙

黃銅弩牙金錯花銀闌線齒如排沙上立準度  
可省括箭溝三道前直窰其度四寸寸五刻漆  
光歷歷無纖差蔡侯出此問誰得往年客遺來

琅瑯琅瑯築城穿厚壤既獲磨洗爭傳誇莫知  
歲月孰製作精妙近世應難加發機高下在分  
刻今人妄射功仍賒願侯擬之起新法勿使邊  
兵死似麻

和劉原甫省中新菊

華省切星斗沉沉嚴燕房秋風茂陵孫種菊爛  
生光天晴蝴蝶飛上下舞雙黃劉郎才筆豪移  
榻吟在傍日晚吏已散殘景上粉墻有酒無飲  
伴掇英襟裾香還思陶淵明弃官歸柴桑東籬

獨此物盈把恨無觴賴有白衣來好事遺壺漿  
適意各一時豈乏同舍郎

依韻和仲源獨夜吟

秋鴻聲澀秋絃苦塗金博山煙夜吐寂歷虛堂  
燈暈生誰人共聽西窻雨

寄題周敦美琨瑤洞

僊人采玉驅雄龍列山剖璞青腔空因邃爲堂  
曲爲室石乳溜壁光玲瓏僊歸龍去草樹長蔽  
翳不復人蹤通指壇買墅下峯下洗斲務欲險

怪窮地鱗鹿跡尚莫到安問樵老諸牛童古人  
未得今已得萬景付與由天公何當歸來歛頭  
角任從寶我生白虹陰溪淺水菖蒲綠下有蝦  
蟇雙眼紅及時佐酒斫兩股勿使更入明月中

許生南歸

大盤小盤堆明珠海估眩目迷精麤斗量入貢  
由掇拾未必一一疵類無不貢亦自有光價此  
等固知魚目殊許生懷文頗所似暫抑安用頻  
增吁倚門老母應日望霜前稻熟春紅稔歸來

爛炊多釀酒沈蕩幽憤傾盆盃九卿有命不愁  
晚朱邑當年是嗇夫

得沙苑楹棹戲酬

蒺藜已枯天馬歸嫩蠟籠黃霜冒榦不比江南  
楂柚酸橐馳載與吳人看

寄題杭州廣公法喜堂

淘青研朱畫屋梁黃漆栢障連曲房日暉月色  
不須照了了自可窺毫芒夕陰花歛似欲病飛  
鳥不驚烏帽郎深山窮谷謾幽僻喜得吳儂是

藥囊

題滿公僧錄西明軒

赤萍纔落鄧林外青銅半磨傍露明飛光斜入  
了不隔坐卧一榻琉璃平西方古胡黃金質貝  
葉傳寫烏行橫謂曉此教居此軒滿壁圖書遙  
峯生

寄題撫州戴秀才息心亭

蒼蒼開幽林峯嶺日相對雲歸垂衣纓泉落嚮  
環珮仕宦雖有負耳目得以貸俯仰宇宙中晏

然維進退

送臨江軍監酒李太博

三江卑濕地北客宦游稀霧氣多成雨雲蒸易  
損衣白醪燒甕美黃雀下田肥未辨殊方語山  
歌半是非

道損司門前日過訪別且云計程二月  
到郡正看暗惡海棠頗見太守風味因  
爲詩以送行

蜀州海棠勝兩川使君欲賞意已猛春露洗開

千萬株燕脂點素攢細梗朝看不足暮秉燭何  
暇更尋桃與杏青泥劒棧將度時跨馬莫辭霜  
氣冷

送雪竇長老曇穎

朝從雪竇請暮卷雲衲輕莫問居士病自從他  
方行吳霜點髭根海鳥隨衆迎安隱彼道場萬  
事都忘情

送襄邑知縣杜君懿太博

霜落水未落令君將度河農耕休叱耒女織罷

鳴梭赤幘驅亭長丹砂挈印窠無慙浚儀政才  
比陸雲多

送晉原喬主簿

太守登車時我病不能出遙期玩海棠度險馬  
屢叱唯畏行邁遲惡欲及春日何爲愛此花曾  
非桃杏匹生紅濃復淺瘦帶脩且密湖傍幾十  
樹雕盤擁新漆酒傾瑠璃盆月上歡未畢縣官  
同遠宦簿領無督詰刻意誅芳菲追補李杜失

十一月十三日病後始入倉

曾非雀與鼠何彼大倉爲狐裘破不溫黃狗補  
其皮霜花逐落月綴在枯槁枝予年過五十瘦  
寢冰生肌

閔尚衣盜袴

昔聞廉叔度能使民多袴多袴非或貪持新不  
忘故嗟嗟亦王官奚自門閥汗中府中紋綾袖  
之呼馬去左右卽其私邀索乃就捕三公出死  
狗訓導能有素今同竊鈇者見爾皆此趣

胡夫人挽歌

子哲

已哉胡夫人其壽七十餘其子哀母死一夕髭  
皓如髭白髮亦白長號守茅廬扶棺埋吳雲來  
會傾市墟誰復向寒月卧冰求鯉魚

裴直講得潤州通判周仲章鹹鼓遺一

小餅

金山寺僧作鹹鼓南徐別乘馬不肥大梁貴人  
與年少紅泥罌盜鳥歸飛我今老病寡肉食廣  
文先生分遺微

贈裴直講水梨二顆言太妙答吳甘三

木言  
卷一  
八  
二百世二  
穎以爲多走筆呈之

綠橘似甘來太學大梨如水出咸陽莫將多少  
爲輕重試擘霜包幾瓣香

送樂職方知泗州

長堤凍柳不堪折窮臘使君單騎行蘇合輕裘  
霜莫犯銅牙大弩吏先迎山旁楚賈連檣泊水  
上禹書寒磬清試向郡樓東北望煙波千里月  
臨城

和劉原甫十二月十日試墨

海神不朝雪不作大梁塵土蔽天高道傍牛喘  
復誰問佛寺吹螺空唱豪相公跪香恬且佚  
陛下減膳心焦勞因君試墨偶有激勇辭壯筆  
揮長刀予無柰何亦思飲飲渴甕甕從鋪糟

十二月十三日喜雪

三日朔風吹暗沙蛟龍卷起噴成花花飛萬里  
奪曉月白石爛堆愁女媧大明廣庭踏朝駕雉  
尾不掃粘宮靴宮中才人承聖顏捧觴稱壽呼  
南山三公免責百姓喜斗酒十千誰復慳

送劉職方知汾州齊

西河風俗厚尚翹古所聞子夏有遺廟千木有  
遺墳太守下車日當先此二君不必汾水上秋  
風看鴈羣

十三日雷後晚過天漢橋堤上行

堤上殘風雪橋邊盛酒樓據鞍衰意盡倚檻艷  
歌留海月開金鑑河冰卧玉虬當年洛陽醉偏  
憶董糟丘

送崔黃臣殿丞之任廬山

驊駒西行四千里直度經橋百尋水石上菖蒲  
未見花蒙頂茶牙初似鬚采時應憶故園春故  
園開焙亦思人其間杜鵑不中聽掩耳聊看錦  
雉馴青崖鞭垂瘦虵尾僊人搯節隨鱗起斫取  
他年跨馬歸劔棧秦山多折筭

十九日出曹門見水牛拽車

只見吳牛事水田只見黃犂負車輓今牽大車  
同一羣又與騾驢走長陌印頭闊步塵蒙蒙不  
似綏耕泥汨汨一夜眠頭向南越烏心腸誰

辨白

吳太博遺柑子

太學先生欺綠橘

裴如晦近有贈

吳興才士與黃柑黃

柑似日勝崖蜜帶葉初擎翠竹籃還料楚王曾  
未識徒將萍實詫江南

和普公賦東園十題

櫨芳亭

結宇東園中種花待春風口歌金縷衣手折枝  
上紅今日映綠髮他年羞青銅

清心堂

寂寞外物亂境清心亦清彼皆居深谷此獨處  
重城夷齊食薇蕨千古首陽名

石筍

削出青山根峭立碧玉圭不作湘竹老不染帝  
子啼不爲盤中蔬豈與煙茁齊

待月亭

明月過三五飛出滄海遲佳人望清夜隔樹光  
離離不須磔蝦蟇寒魄自有虧

虛白堂

空堂絕纖塵虛靜自生白長風吹月東牕戶如  
不隔漆園茲趣深赤水珠難索

假山

太山不可歷石齒齧人足聊集怪與竒蒼蒼都  
在目何須引寒流平地作溪谷

書齋

聖賢有事業皆在經籍中已愛牙作籤可輕山  
賜銅還來讀詩禮不用辨魚蟲

小池

小池依小山山晴光翠入無容羣蛙鳴間有孤  
鶴立曾不起波瀾石郵風自急

紫竹

西南產脩竹色異東筠綠裁簫映檀脣引枝宜  
鳳宿移從幾千里不改生幽谷

山茶

紅蘓勝朱槿越丹看更大臘月冒寒開楚梅猶  
不柰曾非中土有流落思江外

宛陵先生集卷第十六

化圖書館  
Shanghai Library

宛陵先生集目錄卷第十七

除夜雪

和吳冲卿元日

元日

和仲源暮冬見寄

送韓寺丞

和原甫風花

貽妄怒

十六日會靈火

送潘司封知解州

飲酒呈鄰幾原甫

寄渭州王龍圖

雪中赴宿懷鄰幾

送薛虞部

送宣倅馬屯田

觀拽龍舟

二月四日雪

荅劉原甫

聞語十方璉長老

垂拱殿起居聞捷

十五日雪三首

聞蜜賜

送晏寺丞

江鄰幾饌鱗

淘渠

蓬生麻中

賣鹿角魚

夜與原甫步歸

高陽關射亭

京師逢賣梅花

欲訪宋中道

丁右丞挽詞二首

廷老傳沛語戲作

送胥寺丞赴洛

送徐殿丞婺州倅

燕

雨

晴

送胡公疎之金陵

送虞部知信州

送李推官之岳州

和南齋畫壁歌

媽媽

送端式歸漳州

送黃殿丞潤倅

棟花

和端式見贈

楊公蘊華亭宰

保之遺水墨扇

送汝陰宰孫寺丞

和曇穎四明十題

目錄終

卷十七

目錄二

開化圖書館  
Kaihua library

宛陵先生集卷第十七

宋宛陵梅堯臣聖俞著

除夜雪

擊鼓人驅鬼漫天雪送寒臘從今日盡花作舊  
年看著樹多還墮隨風積更乾明朝預王會畏  
濕兩梁冠

和吳沖卿元會

千官車馬閶闔來晝漏始上閶闔開峨峨左右  
升龍進昨夜雪飛雲作堆殿前冠劍魚鱗立東

風入仗旗脚迴黃鍾一奏寶扇掩玳簾捲起香  
霧排鳴梢未盡霹靂響翠輦已退黃金階聖人  
端冕御法座大樂旅作聲和諧群公拊蹈丹墀  
下尙書奏瑞四夷懷乘輿却入更衣閣通天絳  
袍陞玉榻百拜稱觴萬歲聞兩廊賜食簪裾匝  
典傳太定舞綴踈波旋烟歛飭宮車衛官解嚴  
多士退日光停午氣象舒吳君才華天下傑歸  
來作詩傳石渠石渠秘遠無凡愚石渠酬唱皆  
嚴徐我慙短學復在後收餘掇棄聊以書

元日

頻年無入闈今日預朝元  
丹陛發金奏侍臣稱  
玉鐔旗旌搖細仗雲霧啓千門  
却出蒼龍闕衣冠萬馬屯

依韻和仲源暮冬

曾未學黃庭衰顏已可驚  
詩能如阮籍評不愧  
鍾嶸玉軫調初美冰壺想更清  
兔園風雪甚還聽鴈來聲

送韓子文寺丞通判瀛州

嘗聞河間守介直天下無選才才且殊鐵網收  
珊瑚珊瑚得亦難鐵網取亦劬况茲戎馬郊爲  
貳維多謨新春度滹沱冰上少馳驅

十七日和原甫風花偶書

用其韻

風花不戀枝脫萼亂翻飛自學空中雪寧同垣  
上衣繞庭面旋久無著衆鳥爭御何處歸

貽妄怒

飲食無遠近所美貴甘輒南方食蝦蟇密捕向  
清畎齒咀口且諱聞語輒忿喘此物何醜惡猶

勝螺螭蜺西蜀亦取之水田名穀犬彼士不爲  
慙吳人休獨恂豈須若中州牛羊烹大臠

十六日會靈火

章聖皇帝興三宮三宮鼎峙何崇崇天聖七年  
六月尾玉清始災壇宇空于今二十有五載上  
元後夜星軫中乃聞會靈五殿火丹焰徹天明  
月紅千楹萬棟一夕盡赤烟奔突西南風先時  
二日車駕幸爲民祈福輸清衷大臣驕蹇不從  
祀岳靈不歆爲不恭若此示變猶影響宜鑒陛

下無惰容神非怒乙遂及甲天意敬聖不警凶  
不獨洪水累堯德堯仁未及流驩共

送潘司封知解州

鹽池暗湧蚩尤血紅波爛爛陽烏熱岸旁遺老  
記南風五月蒲畦吹作雪白徑嶺上橐駝鳴太  
行山中騏驥茆古人射利今人同行商不困何  
由設朱轡太守自東來先世大夫留故轍是非  
取與應不移秦人休衒張儀舌

飲酒呈鄰幾原甫

天地不爭行日月不爭明晝夜自顯晦冬春自  
枯榮夸父逐日死共工觸天傾二子不量力空  
有千古名寄語賢與愚何嘗見長生我願會良  
友醉顏日常頽東海爲酒罇五湖爲杯羹海罄  
湖且竭盡倒爲解醒苟死不復知苟生徒牽情  
項籍乘牛車馳上廣武城強梁取秦鹿慷慨猶  
爲輕歸來卧酒家豈得慙公卿樂亦但如此舉  
世任營營

寄渭州經略王龍圖

西城索駝來賀蘭入貢美玉天可汗蕭關夜開  
月團團彈筆古峽鳴哀湍前將軍不擐甲取大  
官今將軍能撫士尙盤桓河西五郡兵氣完駿  
馬躡棧無箭瘢我嗟乘劣不受鞍馬得乞與都  
人看

二十一日雪中赴宿懷鄰幾原甫

正月東都雪多於舊臘時酒賓臨迥閣野雀集  
枯枝馬向西城度花從上苑遲劉郎與江叟相  
對定爭碁

送永興通判薛虞部

灰宮盜玉秦樓空南山不老天無窮  
薛碑剝爛少文字雨耕拾寶牛蹄中  
其旁築城聚貔虎黃土岌業如削  
銅西州吏人氣吐虹摧鱗斂角聽  
相公少年別乘勤爾躬幙府甚盛瓊瑤叢

送宣州簽判馬屯田兼寄知州邵司勳

寒溪翠拖碧玉帶蒼山晴卧蛻骨龍  
水邊苦竹抽肥笋石上老蕨拳紫茸  
泊船繫纜宿明鏡昭亭廟古攢瘦松  
陰風雨電潭心起雲遮北嶺如

墨濃田秧浸綠白鷺立內史出喜嘉賓從昔時  
謝公來賽神蘭肴作椒金作鍾聯詩姓何名已  
失板蠹粉落蟲鳥蹤我鄉復傳召南化磨鏤黑  
石君亦逢

觀拽龍舟懷裴宋韓李

截春流築沙坻拽龍舟過天池尾矯矯角岐岐  
千夫推萬鱗隨驚鴻鵠沉魚龜春三月輕服時  
薄水殿習水嬉馬特特來者誰魏公子人不窺  
車鞦鞦集其涯邳鄆倡士交馳銀鉞索酒傾玻

璿用錢如水贈舞兒却入上苑看闔雞擊毬彈  
金無不爲適聞天子降玉輦當門虎脚看大旗  
春風吹花入行輶紅錦百尺爭蛟螭雲蓋迴綵  
纜維明年結客觀未遲

二月四日雪

前日春風初擺條昨夜雪飛深一尺北帝及臘  
不行令東皇發煦遭爾厄侵時奪氣四時錯歡  
問上天何不責天高地厚語難通俛首下土徒  
叩額或言莫信難可聞鶴鳴至微猶不隔休問

梅言  
卷十七  
二百六十一  
天問顏躡休看花看壘麥

荅劉原甫

生平多交友常恨會遇稀每念相笑語昨是今  
或非重惜向時游出處若乖違從今儻有酒莫  
問梨栗微前夕呼我飲遣奴來扣扉暗犯風雪  
往醉脫冠服歸夜來新霽月清吐萬里輝劉郎  
戴幅巾江叟披褐衣相過無百步誰虞竊訶譏  
三家若循環但知具甘肥

聞語十方璉長老

舊居廬嶽寺新化給孤園還享國人供應無塵  
事喧有來聽喻筏一悟見吹幡不憶爐峰下臨  
溪看飲猿

十一日垂拱殿起居聞南捷

二月雪飛雞狗狂錦衣走馬回大梁入奏邕州  
破蠻賊絳袍玉座開明堂腰佩金魚服金帶楊  
前拜跪稱聖皇一朝嚴氣變和氣初令漏泄飛  
四方將軍曰青才且武先斬逗撓兵後強從來  
儒帥空賣舌未到已愁茆葉黃徘徊嶺下自稱

疾詔書切責仍勉當因人成功喜受賞親戚便  
擬封侯王昔日苦病今不病銅鼓弃擲無鏢鎗

十五日雪三首

寒令奪春令六花侵百花塘冰膠燕紫野水澀  
芹牙擁柱輕於絮吹墀淨若沙乳禽饑啄木誰  
悞撥琵琶

新雷奮虵甲密雪鬪鵝毛正欲裁輕縠重令著  
弊袍沙泉流復凍烟萼坼還韜只待隣醅熟微  
聲聽酒槽

春風九十日一半已銷磨準擬看花少依稀詠  
雪多官車猶載炭抱鵲不離窠向此興都盡戴  
家誰復過

聞密賜

朝聞政府賀捷回夕賜明月五千枚巍巍聖皇  
德所該廟略付與何有哉况未覆穴翦渠魁宜  
先戰士老與孩傾肝瀝膽謝不敏豈可便恃張  
良才

送衛真宰晏寺丞罷長安

拾琴辭苦縣解劔入函關鵲報遠人至馬衝春  
雨還荒榛郊北囿葱翠國南山歸見蕭何政條  
今舊鎬間

江鄰幾饌鮓

泥鮓魚之下曾不享嘉賓又嫌太健滑治洗煩  
庖人煎炙亦苦腥未嘗輒向脣江侯昔南官家  
膳無此珍昨日邀我餐下筋勝紫鱗乃知至賤  
品唯在調甘辛

淘渠

開春溝畎春泥五步掘一塹當塗如壞堤車無  
行轍馬無蹊遮截門戶雞犬迷屈曲措足高復  
低芒鞋苔滑雨淒淒老翁夜行無子携眼昏失  
脚非有擠明日尋者爾瘦妻手提幼女哭嘶嘶  
金吾司街務欲齊不管人死獸顛啼

蓬生麻中

麻畦無曲本蓬質有樛莖所托修仍直安能縱  
復橫擇鄰聞舊母益友記諸生蕭艾從茲遠蒿  
萊不可并何嗟蔣詔逕孰念衛人行儻匪緣其

地秋風廣漠驚

賣鹿角魚

水中龍角而足海小魚角蠢蠢不擬龍乃擬鹿  
譬彼蝸抗璽犢漬以醎鹵久且醜特賣都市參  
鼎餽此人何苦獸猪羊其爾臭味不飽腹

夜與原甫江家步歸 二十三日

丹砂漆盤盛井水冷浸半坼山櫻花始見春色  
不柰喜黃昏招飲夜還家劉郎居南我居北陌  
上泥開天正黑風吹蠟燭燒未明素絲作履惜

不得

高陽關射亭

星弧射狼夜夜張角弓備寇不可忘將軍屯師  
古關下不尚武力何由強日與兵官來會此弓  
須射硬箭射長更如羿中九鳥斃獨見杲杲明  
扶桑

京師逢賣梅花五首

此土只知看杏菜大梁亦復賣梅花此心還似  
庾開府不惜金錢買取誇

驛使前時走馬迴北人初識越人梅清香莫把  
茶蘼比只欠溪頭月下杯

憶在都君舊國傍馬穿脩竹忽聞香偶將眼趁  
蝴蝶去隔水深深幾樹芳

曾見竹籬和樹夾高枝斜引過柴扉對門獨木  
危橋上少婦髻鬟猶戴歸

此去吾鄉二千里不看素萼兩三年移根種子  
誰辛苦上苑偷來直幾錢

三月五日欲訪宋中道遇雪而止

蝴蝶飛時雪鬪輕  
滿街掩亂得人驚  
欲尋宋子東城去  
馬畏春泥不敢行

觀文丁右丞挽詞二首

預政公槐亞談經帝席陳  
儉恭齊國相清淨漢  
廷人去夢嘗爲蝶  
遺文不解麟  
一聞車馬幸豐  
賜及孤臣

春風百花發露挽九原歸  
白馬悲鳴駐黃鸝  
下上飛壠邊新栢  
盛門外弔人稀  
獨見東牀客  
攀車淚濕衣

松言  
卷十七  
十一  
廷老傳沛語戲作

夷門市裏侯羸老公子時能釋禮過莫問孟嘗  
招致客薛中遺俗尙應多

送胥平叔寺丞赴洛

單車細馬出虎牢春雲黝黝百舌噪穀雨已近  
花欲盡秉燭夜飲朝坐曹因君重思昔日歡醉  
筆狂掃嵩丘高于今零落二十載縱在各各歎  
二毛試採上陽何首烏刮切仍致苦竹刀俗情  
相望亦異此競欲折筭籠含桃

送婺州通判徐殿丞

赴上當在後年夏

疾湍怒蛟龍不畏東風逆  
泔泔奔長淮千里在  
咫尺辭梁始及晨過宋  
尙未夕南州豈難到  
何處淹行迹

三月十日韓子華招飲歸成

清明曉赴韓侯家  
自買白杏丁香花  
雀眼塗金銀茂籠貯在  
當筵呼舞娃舞娃取捧  
笑向客不顧插壞新烏  
紗朝來我舍報生子  
賀勸大白浮紅霞酒狂  
有持梧桐板暴謔一似  
鄱陽槎祖禡

擊鼓禰處士當時偶脫猛虎牙  
褊裒不容又何益鸚鵡洲上空蒹葭

送下第親舊

花開風雨惡坐見紛紛落  
明日結子時又復有脫萼  
莫嗟樹漸老樹老子亦著  
共愛西枝繁不數東枝弱  
他年會有春却看西枝薄

鷺

一避吳宮火千年楚屋春  
翅迎風雨健聲入戶庭  
頻掠水過長渚啣蟲落  
覆塵休將漢皇后故

故比輕身

雨

春雲易成雨一日幾迴陰  
燕濕飛猶快花寒色更深  
邀車愁客遠盤馬畏泥侵  
向晚晴光吐西牕綠影臨

晴

風掃天如鑑雲開日似萍  
苑花猶帶濕蔬甲已微青  
蝶翅粉應薄塘潏波更渟  
尋春不惜醉莫笑髮星星

送胡公踈之金陵

綠蒲作帆一百尺波浪疾飛輕鳥翮瓜步山傍  
夜泊人石頭城邊舊游客月如冰輪出海來江  
波千里無物隔自古有恨洗不盡于今萬事何  
由白依稀可記鮑家詩寂寞休尋江令宅楊花  
正飛魴魚多食膾舉酒謝河伯但令其肥日飽  
腹誰用麒麟刻青石去舸已快風亦便寧同步  
兵哭車輓

送裴虞部知信州

攢青歷歷正面山刺史日坐雲屏間楚人竟握  
水精璞漢女買作月珮環時惟產寶不重穀願  
當化俗無棄管往辭丞相有言物景清絕何  
由攀

送李推官之岳州

崑崙燕子五兩竿霧露薄水平湖寒風帆美滿  
八百里夕從岳陽樓上看魚跳鷺立月鉤下星  
斗爛爛垂欄干羽書不到罇俎裏蠻兵况去荆  
楚安試尋燕公舊賦筆磨圭刻碧獨可完

和和之南齋畫壁歌

終南下臨長安城峻欄高檻黃金羸嵩山亦近  
洛陽陌鮮車怒馬一日程大梁平廣匝千里不  
見雲峰來眼底其間自有高趣人掃室呼工崑  
壑啓初疑巨靈勇擘華不比將軍能聚米暗雨  
輕烟滿室中塵事如脂一朝洗又將餘力作脩  
竹石上數莖風撼玉葉斜枝亞寒聲盡節老根  
穉生意足何須踐苔眠綠陰然後始爲嵇阮公  
三賢歌詠已見意舞女不看頻整簪

媯婦

黃金一丸入雲端群貧望逐滿長安衆人爲貴  
媯不惜弃擲如泥資彈射藏身葉底有能鳴辜  
負春風拖雨翮不飛上天訴至珍幾人辛勤揀  
砂石

送端式歸漳州

來居天王都常夢苦竹溪乃識高僧趣不爲利  
物迷海燕乘華屋區區竟啣泥安知矯翼鷗豈  
類斷尾雞性同而質殊何必莊指齊

送黃殿丞通判潤州

前年江州飛火龍樓殿化盡山將鎔今聞棖棟  
復華壯大閣渠渠出波上南徐別乘簡且間下  
馬岸傍呼畫舫末日江風不畏人檝師猱獍欺  
白浪衣上京塵莫馱多斗擲中流雲在望

揀花

紫絲暈粉綴薜花綠羅布葉攢飛霞鶯舌未調  
香萼醉柔風細吹銅梗斜金鞍結束果下馬低  
枝不礙無闌遮長陵小市見阿姊濃熏馥郁升

鈿車莫輕貧賤出閭巷  
迎入漢宮人自誇

次韻和端式見贈

不爲阮步兵發詠怨朝陽  
不學屈大夫行吟思  
搴芳其雨豈無時細佩空自香  
吾道不苟合我  
懷固有常江南一畝宅  
近在句溪旁仕官且如  
此夢寐安敢忘以子論言  
多重歌木桃章

楊公蘊之華亭宰

月徑千里大中有神娥  
宮宮旁種玉桂柯葉垂  
瓏瓏蝦蟇穴其根出輒氣  
墨蒙光魄縱復吐血

赤如頑銅不知從何時更使人蹤通年年折桂  
枝寬少尙易充今年拗都盡秃株立童童株秃  
莫爾攀墮雲雙手空歸來走海上買鶴問吳翁  
端午前保之太傅遺水墨扇及酒

畫扇雙酒壺置前兵吏立言將國匠奇重以風  
義執樹石冰上看山河月中入便持菖蒲飲不  
畏青蠅及

送汝陰宰孫寺丞

舩郎唱榜鷺尾下潁水落日虵鱗生綠蒲被岸

漁網舉黃鳥啄甚繰車鳴吏無詬租官正來不  
借魴鱖與吏烹饋吏人情見里黨官非喜慢知  
官清

和曇穎師四明十題

雪竇山

重雲不蔽春深竇常有雪曉月號松猿晴壁挂  
海霓終恍無心人區區佩環玦

龍隱潭

老龍戀潭窟不雨亦不雲吐涎出溪滑吹腥隔

林聞疾雷驅未去魚鱷競紛紛

含珠林

山爲驪龍蟠谷作驪龍顛珠樹存其間誰採明月來何須循海隅笑蚌未成胎

偃蓋亭

旣將茅覆簷復有松爲蓋五里入山時憇此得寒籟曾無康樂游但見雲衲會

雲外菴

山僧好寂靜入雲恨不深峰間一雨昏林表孤

燈沉往來有猿狖呼嘯自成音

石筍峰

巨石如龍孫聳聳烟霧裏明明落落溪口納納喧  
灘齒何當助齋盂菌蕃徒爲美

宴坐巖

智覺禪師  
於此不睡

心危身亦危衽席尚顛墜如何崑石上來坐自  
安意能喻死生間無論寤與寐

三層瀑

山頭出飛瀑落落鳴寒玉再落至山腰三落至

山足欲引煮春山僧房架剝竹

丹山洞

山無鳳皇飛洞有僊人跡蝙蝠大如鴉莓苔偏  
上屐自慙無道骨安問緣雲客

獅子巖

崑形若狻猊不能千里走豈無鳥獸群當假風  
雷吼寄謝棲息人想像真妄有

宛陵先生集卷第十七

宛陵先生集目錄卷第十八

和原甫省中畫壁  
和原甫山水

和原甫見寄  
醉和范景仁東軒

與子華自內中歸  
送傅都官待闕

吳沖卿出飲鼎  
江鄰幾邀觀書

和沖卿秘閣觀墨蹟

同鄰幾登吹臺  
逢羊

和張寺丞見贈  
和原甫對月見邀

和原甫月夜獨酌  
和原甫早起朝

和原甫盆池  
送提點施屯田

和鄰幾晚赴館宿  
送蒙城宰林寺丞

和原甫曉雨  
送余中舍知德陽

勉裴如晦  
送謝寺丞知餘姚

與蔣秘校久別復見

別弟彥臣  
和穎老見寄

送余中舍韶州錢監

七夕詠懷  
送弟禹臣

送叔昭上人  
山茶樹贈李廷老

送吳都官成都倅

和原甫昭君辭

再依韻

飲劉原甫舍人家

和永叔退朝見寄

劉涇州硯

送劉秘校赴婺源

送閻郎知磁州

和景彝冒雪晚歸

和景彝赴鄰幾飲

和沖卿傷何濟川

和景彝赴省宿

送李獻甫

送周諫議知襄陽

和原甫畫蟹

目錄終

開化圖書館  
Kaihua Library

宛陵先生集卷第十八

宋宛陵梅堯臣聖俞著

依韻和原甫省中松石畫壁

富彥國為省判日令

許道寧畫

山林與城闕事物不相對唯聞秉道義所處無  
內外趨煩而毀靜此理乃俗輩昔有天下賢喜  
得名筆會買粉塗南墻松石生屋內石怪如春  
濤松偃如起籟畫來二十年數偶未輒愛罕親  
憑按顏但覩抱犢背雖當省闥嚴晦昧欲何賴

今逢茂陵人獨唱亦豪邁

依韻和原甫廳壁許道寧山水云是富

彥國作判官時畫

山情水思半軒間試問來居有底間唯有才高  
方暇佚無論歲月自能攀

依韻和劉原甫見寄

憶昔游臨汝于時太守賢山尋順風處城得豢  
龍遷民頸纍纍大池荷一一圓周碑嗟缺矣少  
室望斲然羸馬居人後歸禽落我先事還如響

蒼老去若波旋賦分都應定元功豈得偏不須  
天以問自可鑒於前王粲今方樂邊韶舊好眠  
漢宮聊擲彩梵學競通禪語道滔滔是論情往  
往牽平生二三友南睇不勝情

醉和范景仁賦子華東軒樹次其韻

五月

十日

樹影落東墻影微人已醉休看枝上綠但對眉  
間翠

五月十四日與子華自內中歸

君注起居同左史我爲委吏退延和共經南陌  
東風急側帽偷看意已多

送傅越石都官歸越州待闕

越客舟從真定至夜夜鏡湖生夢寐曉度吳江  
百尺船洗眼重看會稽翠買臣負薪樵徑荒伯  
鸞貨春苔白棄綠橘黃柑帶葉收白粳紫蟹侵  
霜飲食蟹易美粳易飽綠橘佐酒柑佐醉莫論  
仕官遠與近布被練袍何所利君恬不忍乞丐  
爲且返故廬聊以遲

吳沖卿出古飲鼎

精銅作鼎土不蝕地下千年  
鮮花冪腹空鳳卵  
留藻文足立三刀刃微直左耳可執口可斟其上  
兩柱何對植從誰發掘歸吳侯來助雅飲歡  
莫極又荷君家主母賢翠羽胡琴令奏側絲聲  
不斷玉箏繁繞樹黃鸝鳴不得我雖衰亦爲之  
醉玩古樂今人未識

二十四日江鄰幾邀觀三館書畫錄其

所見

五月秘府始暴書一日江君來約予世間難有  
古畫筆可往共觀臨石渠我時跨馬冒熱去開  
厨發匣鳴鑰魚義獻墨迹十一卷水玉作軸光  
䟽䟽最奇小楷樂毅論永和題尾付官奴又看  
四本絕品畫戴嵩吳牛望青蕪李成寒林樹半  
枯黃荃工妙白兔圖不知名姓貌人物二公對  
奕旁觀俱黃金錯鏤爲投壺粉障復畫一病夫  
後有女子執巾裾牀前紅毯平圍爐牀上二姝  
展氍毹繞牀屏風山有無畫中見畫三重鋪此

幅巧甚意思殊孰真孰假丹青模世事若此還  
可吁

依韻吳冲卿秘閣觀逸少墨蹟

奇哉王右軍下筆若神聖長戈與伏弩無不從  
號令賢豪雖林立帖歛孰敢競師徒氣揚揚龍  
虎旗正正勝聲塞宇宙自昔無此盛赫赫猶至  
今瑰瓚曷云並崇崇中秘書濟濟士游泳墨寶  
收盈厨來觀遇已橫始知前人蹟鐫多自失勁  
紙素儻未壞萬古傳莫竟一從歸人間夢寐不

能更但媿將短才輒爾接高詠何羞趙壹窮自  
有鍾嶸評嘗聞曹將軍尙請賦競病我生群俊  
末貧賤亦足慶文成終愧君鉛刀值枯梗

同江鄰幾龔輔之陳和叔登臺有感

在昔梁惠王築臺聚歌吹笙簫無復聞黃土化  
珠翠當時秦兵強今亦歸厚地我與諸賢良舉  
酒莫言醉曾誰問孟軻空自有仁義

逢羊

予晨過北郭見群羊有羝處前其首叩然而偉

膾其角拱然而聳其毛茸然而長自膊至腕  
燄燄與纓胡相若其群狼逐而擁趨如奉焉  
及其宰也羝存而群死之予歸作詩示諸友云  
牧人垂長髯驅羊從北道老羝壓大群毛比長  
髯好暮歸同一欄朝出不擇草旣肥當用烹從  
羝羝獨保狡誘以全軀角尾徒爲老

依韻和張中樂寺丞見贈

胡車走鞞鞞暮車走碌碌黃埃蔽車輪赤日爍  
車屋靡論遠與近安問踈與孰賢愚各有求徃

返相磨穀我馬不出門我蹟亦以跼心慕中樂  
賢道義聞且宿其言清而新其貌古不俗書可  
到二王辯可折五鹿往見未爲勞定交然後篤  
惠詩何勁敏對敵射銅鏃穿楊有舊手驚雀無  
全目強酬非所當宜將弓矢速

依韻和原甫對月見還不至

每愛孔北海罇中常不空今無酒與客唯  
有月兼風遠色曾何隔微涼亦已同更期三五夕靜  
坐接談叢

依韻和原甫月夜獨酌

月下馬蹄休擾擾夜涼蟲響競囂囂一杯獨飲  
愁何有孤榻無人膝自搖北斗柄高天漸轉小  
冠簪冷髮微凋誰知靜對頽然影竟夕幽懷豈  
易聊

依韻和原甫早赴紫宸朝待旦假寐

月落西樓露氣寒大明將謁望清斑燭房猶照  
衣冠上漏舍欲爲魚鳥間入仗采旗開日月在  
庭公衮儼雲山我慙一似朝宗水亦得隨流到

海還

依韻和原甫新置盆池種蓮花菖蒲養  
小魚數十頭之什

瓦盆貯斗斛何必問尺尋菖蒲未見花蓮子未  
見心小鮮不足烹安用芡餌沉戶庭雖云窄江  
海趣已深襲香而玩芳嘉賓會如林寧思千里  
游鳴櫓上清泠

送施屯田提點銅場兼相度嶺外鹽入

虔吉

江西采銅山未竭南越熬波海將結主人貪利  
不畏刑白日持兵逾盜竊銅私鑄器鹽奪商死  
共吏爭蛇鬪穴姦豪乘勢倚蠻陬劫掠聚徒成  
蟻垤今雖驅翦嶺下平尙恐根存更生孽因擇  
健才通便民付職與權將有設秋香亭上共爲  
賓却作主人殊少悅徂東走北十五年只有山  
川看不別

依韻和江鄰幾癸巳六月十日同刁吳  
韓楊飲范景仁家晚赴館宿觀吳興太

守章伯鎮題壁記辛卯仲秋初吉九月

十一日十月二十二日十二月十一日

壬辰二月一日館直慨然有感

江翁多感槩飲散來直廬題蹤有舊友連蹇常  
與渠昨歸天祿下念昔悲有餘未久復外補安  
能戀清虛得請向茗雪幽懷寄禽魚高城浸湖  
光面面當紅蕖晚乘畫舫游四坐羅輕裾數杯  
已醅酹萬事應破除不愛趨時近不恤與世踈  
百歲且過半冉冉將焉如誰慕八十叟猶在磻

溪漁嗟哉再宿夕乃自仲秋初清談固隔絕可  
見壁上書

送林大年寺丞宰蒙城先歸餘杭逋之  
姪孫

東方有奇士隱德珠在淵川壑爲之媚草樹爲  
之妍歿來十五載獨見諸孫賢煌煌出仕塗皎  
皎如淮蠙今爲蒙城宰歸問浙江船何時度楊  
子夜入明月邊有鳥不化鳧有琴何用絃真趣  
還自得治民唯力田

依韻和原甫六月八日曉雨

侵曉忽飛雨颯然戶庭涼滴堦初聞聲濯樹暗  
有香吹燭焰閃閃鳴雞濕昂昂稍已便衣冠喜  
氣眉宇翔安然如涸魚响沫久已望塵纓自可  
潔何必念滄浪

送余中舍知漢州德陽

匹馬易爲秣單車長是輕秋風來棧道宿雨度  
關城石上樹林暗山根江水明桐花鳳何似歸  
日爲將行

勉裴如晦

裴侯失嬰兒心腸如焚煎愛玩白玉玦墜地不  
復全收拾見顏色瑩徹猶自妍鳳皇生九雛一  
卵破易捐况多令男子拭淚慰目前

送謝寺丞知餘姚

其姪師厚嘗宰此邑

姚江千里海汐應山井亦與江湖通秋來魚蟹  
不知數日日舉案將無窮高堂有親甘可養下  
舍有弟樂可同縣民舊喜諸郎政芻力莫媿今  
爲翁

與蔣祕別二十六年田棐二十年羅拯

十年始見之

我今五十二常苦離別煎屈指數離別正去一  
半年三君異出處相見有後先蔣最會遇早羅  
倍晚於田仕宦比我遲官資居我前此亦漫輕  
量無限歸荒埏所喜笑語同各驚顏貌遷髮有  
霜華侵目有蜘蛛懸有酒易以醉有奚徒用妍  
醒來念功名病螾希蛇蜒安得有園廬寬間近  
林泉養魚數千頭種薤三四廛餘蔬皆稱此嘉

果植亦然既無俗造請窮冬事高眠困貯白粳  
稻酒沽青銅錢飯過引數杯令兒誦嘉篇仰首  
看赤日區區隨天旋朝見出滄海暮見入虞淵  
畢竟將何窮磨滅愚與賢億億萬萬載筋骨非  
玉堅桐棺三寸厚在昔誰免焉去去欲及時嗟  
嗟無由緣

別三十弟彥臣

二十八日

朝辭都城裏暮止汴堤頭滿目非相親寂默對  
河流

依韻和雪竇山曇穎長老見寄

處山無獸山林鳥正關關月入潭心白花明谷  
口間采薪能自至流水不知還聞欲觀滄海高  
峰峻亦攀

送余中舍監韶州錢監

孤青水中石片白蒼梧雲虞舜不可見蕭韶不  
可聞君爲漢錢官鑿山取銅鑛韶石不生銅留  
爲千古景

七夕詠懷

織女無耻羞年年嫁牽牛牽牛苦娶婦娶婦不  
解畱來往一夕光奕奕河漢秋輕傳人世巧未  
知何時休喜鵲頭無毛截雲駕車輶老鴉少斟  
酌死欲同造舟明月不到曉是夜曲如鈎天意  
與物理注錯將何求嘗聞阮家兒犢鼻竹竿頭  
人生自有分豈媿曝衣樓

送弟禹臣

王都寓居樹陰少惟有墻隅兩株棗去年相見  
棗花開今年相別棗實好棗實未剝風莫吹我

鬢愁多似蓬葆淮南到時何所逢秋葉蕭蕭蟹  
應老憶昔共歸江上初對飲蘆洲月如縞半夜  
魚跳鏡破光萬事臍然何足道自此重經二十  
秋不改青青岸旁草

送叔昭上人附施屯田歸宣城

瓶巾過江去遠託故人船借問風濤勢何如杯  
度年

山茶花樹子贈李廷老

南國有嘉樹華若赤玉杯曾無冬春改常冒霰

雪開客從天目來移比瓊與瑰贈我君大梁蓬  
門方塵埃舉武尚有礙何地可以栽每游平棘  
侯大第夾青槐朱欄植奇卉磨碧爲壅臺於此  
豈不宜亟致勿徘徊將看榮茂時莫嗤寒園梅

送吳照鄰都官通判成都

君家婦何賢捨舟具車轂五年夢在梁三年行  
向蜀迢遞今日同辛勤昔時獨看花久莫畱買  
錦慰不足歸來兒女大婚嫁應相續

依韻和原甫昭君辭

武帝常勒兵北登單于臺始欲以威伏竟亦慙  
懷來徒令出塞師萬里求龍媒未弭後世患王  
顏困黃埃丹青不足恨謀慮少徘徊月如漢宮  
見心向胡地摧在昔李少卿聽笳動悲哀壯士  
尚如此娥眉安得開情語旣不通豈止腸九回  
初冬誠難保死不如草萊

再依韻

一嫁異域去不復臨鏡臺念昔辭家時豈爲單  
于來適遐固亦命配醜非由媒始欲並日月今

嗟隨風埃僕侍共慘戚山川空徘徊鴻鴈爲之  
悲肝腸爲之摧寧聞琵琶樂但聞琵琶哀休言  
羊酪甘誰喜羶廬開故國萬餘里此生那得回  
乃知女子薄莫比原上萊

飲劉原甫舍人家同江鄰幾陳和叔學  
士觀白鷗孔雀鳧鼎周亞夫印鈿玉寶  
赫連勃勃龍雀刀

主人鳳皇池二客天祿閣共來東軒飲高論雜  
談謔南籠養白鷗北籠養孔雀素質水紋織翠

毛金縷薄大誇鳧柄鬪不比龍頭杓玉印傳條  
侯字辯亞與惡鈿劔刻辟邪符寶殊制作未觀  
赫連刀龍雀鑄銀鐔每出一物玩必勸衆賓酌  
又令三雲髻行酒何婫約固非世俗驩自得閱  
古樂聖賢浪浪去安有不死藥竟知不免此烏  
用強檢縛開目卽是今轉目已成昨歸時見月  
上酒醒見月落恍然如夢寐前語誠不錯

次韻和永叔退朝馬上見寄兼呈子華

原甫

公歸初退內朝班  
馳道南頭躍錦鞍  
欲雨浮雲猶復暗  
背陰殘雪愈生寒  
穿槐已覺春禽語  
載酒重思結客驩  
吟寄侍臣知有意  
翠鬟爭唱口應乾

劉涇州以所得李士衡觀察家號蟾蜍  
硯其下刻云天寶八年冬端州刺史李  
元德靈卵石造示劉原甫原甫方與予  
飲辨云天寶稱載此稱年僞也遂作詩  
予與江鄰幾諸君和之

硯如剗墓腹如月又若剖瓢萌強發鐫題天寶

年造之刺史李元傳自越剗墓剖瓢我莫分稱

載作年初辯君君雖能辯猶曰寶原甫詩云李侯寶硯劉侯

得寶茲偽物吾何云仰天大笑飲君酒硯真硯

偽休開口願封漆匣還與侯請共江翁獨持守

江詩云劉侯寶此處勿忘慎勿將心逐名轉

### 送劉攽秘校赴婺源

雲木葱蘢處雞鳴古縣城山高地多險源近水

偏清斫漆資商貨栽茶雜賦征案頭龍尾硯切

莫苦求精

送閻中孚郎中知磁州

簫管梁王臺風雪邯鄲道君行守趙城我向夷  
門老持麾邦寄重歌袴民欣早重岡古獵場驚  
兔離衰草

次韻和王景彝十四日冒雪晚歸

子猷多興憐飛雪向晚歸時又見飄拂馬隨人  
如着莫舞空吹面亦勝消閉門我作袁安睡呵  
筆君爲謝客謠記取明朝朝謁去毳裘重戴冷

寥寥

和王景彝晚逢赴江鄰幾飲

殘雪晚生寒良朋邀我飲逢君三省歸交響一  
相審乘興興未盡既杯杯太甚夜闌踏月迴火  
冷人已寢

次韻和吳冲卿傷何濟川

生愛虛名苦辯亡淪精竭智可哀傷誰將事附  
三公傳自有文誇古戰場墳土未乾還卜穴挽  
聲纔絕又新章是非從此方應定弟子猶爭左

氏長

次韻景彝赴省宿馬上

烏紗帽底青眸轉朱雀街頭玉轡搖燈火高樓  
吹短笛簾櫳斜巷隘初宵身歸蘭省唯看月心  
在天津欲倚橋枕上夜深應不寐羨他年少酒  
微銷

送李獻甫

覽君南來詩如對江上景今忽告我歸東風生  
馬頸馬行日幾里到家梅萼遲重登石頭城爲

梅詩  
卷十八  
十一  
我一引領

送周諫議知襄陽

藹藹荊州幾萬家  
竟持壺酒望高牙  
兒尙唱銅鞮曲  
耆舊爭隨畫鹿車  
雄鴨綠頭看漢水  
肥鱖縮項出漁查  
鄉人應笑張平子  
只有歸田賦可誇

依韻和原甫廳壁錢諫議畫蟹

諫議吳王孫  
特畫水物具  
至今圖寫名  
不減南朝顧  
濃淡一以墨  
罄殼自有度  
意將輕蔡謨  
殆

被螿基誤

宛陵先生集卷第十八

每寺

卷第十八

十三

新學基  
卷一  
十一

開化圖書

Kathua library

新學基

宛陵先生集目錄卷第十九

和景彝喜子修書 送趙虞部

月蝕 和刁景純春雪

和楊待制詠雪 和景彝宿省

姪與甥下第 次韻和永叔

和范舍人對雪 歲旦呈永叔

和沖卿歲暮有懷 和沖卿元日

和景仁對雪 三和景仁對雪

和永叔新歲書事 送辛都官知鄂州

和景彝過景靈街

送韓玉汝知洋州三首

李祠部寄荆栝

韻語答永叔內翰

和子華移紅薇

和吳舍人即事

和長文社日出郊

和長文禱祀郊外

送馬都官

和景彝詠薜荔

和鄰幾賞小桃

長歌行

和長文春雨二首

送滕寺丞歸蘇

和酬永叔

和鄰幾同過金明池

目錄終

宛陵先生集卷第十九

宋宛陵梅堯臣聖俞著

次韻和酬裴寺丞喜子修書

唐宋典冊竟駢羅漢詔重令與削磨古聖規模  
猶可法衆賢馳騁必無蹉旣除太史來爲尹遂  
用非才往補訛代匠只憂傷手甚君宜憐我不  
遑他

送趙虞部士宏知蜀州

春風跨臘至雪作蝴蝶飛偏知蜀太守撩亂撲

行衣何當海棠下  
歌管紅袖圍一飲一斗酒決  
訟如發機洛陽花自好聽從杜鵑啼

月蝕

有婢上堂來白我事可驚天  
如青玻璃月若黑  
水精時當十分圓只見一寸明  
主婦煎餅去小兒敲鏡聲  
此雖淺近意乃重補救情  
夜深桂兔出衆星隨西傾

次韻和孺刁景純春雪戲意

雪與春歸落歲前  
曉開庭樹有餘妍  
楊花撲撲

白漫地蛟蝶紛紛飛滿天胡馬嘶風思塞草吳  
牛喘月困沙田我貧始覺今朝富大片如錢不  
解穿

次韻和楊樂道待制詠雪

梁苑孝王跡灞陵游客心牧羊來海上泛棹向  
山陰興賞曾何淺羈棲亦以深穆歌猶在竹郢  
曲自傳琴旗凍霑天仗槍寒拂羽林且爲豐歲  
慶休作苦寒吟掩帙都忘慮焚香靜擁衾晴明  
一登閣暮色徧高岑

次韻和景彝閏臘二十五日省宿

君嘗納史似吳兢又直甘泉馬踏冰重臘雪花  
方漫漫宿廳書架自層層按頭美酒初溫火簾  
底微風欲動燈永夜未眠鍾已發此心間寂是  
高僧

姪宰與外甥蔡駟下第東歸

事莫必有勝必勝難可持迺來罕相見世上多  
誇馳黃金鑄佩印白玉刻佩龜朝見恃赫赫夕  
見同蚩蚩方得靡不羨旣處焉所施此理非一

日更後當應知志士無終窮斯言非爾欺

次韻和永叔

省樹高槐雪墜條沉沉古屋蔽疏寮每嗟守印  
如枯木欲棄明珠學緯蕭漸老但知貧賤樂向  
來徒用歲時銷新年不管魚龍躍安得乘風入

剡樵

次韻和范景仁舍人對雪

三尺沒腰雪京華頻歲無高低相掩覆竅隙似  
封糊帖缺都迷醜增妍不問枯因時混貧富遇

物得圓觚眩目曾何數流風不可圖冥冥山霧  
合浩浩海雲舖未覺花飛葉先看霰集珠落機  
裁扇素獵野割膚腴粲爾娥奔月皓然叟赴醮  
薄才今揣稱小巧媿非夫

嘉祐己亥歲旦永叔內翰

堦前去年雪鏡裏舊時人不覺應銷盡相看只  
似新屠酥先尚幼綵勝又宜春獨愛開封尹鍾  
陵請去頻

次韻和吳沖卿歲暮有懷

舊曆卷將盡慨然增永懷  
唯希步兵醉莫作大  
常齋孟浪從人笑踈愚共世乖  
定知當汨沒名  
不與功偕

次韻和冲卿元日

天心欲銷變元會罷來朝  
新歲起今日舊年猶  
昨宵凍雲低覆闕殘雪  
稍封條又聽驅儻鼓群  
邪不可饒

次韻和景仁對雪

北風吹雪至浩蕩地疑無  
弈弈將如舞漫漫欲

似糊沙場行不盡銀漢落應枯興發詩千首豪  
吞酒百觚山川容可改圭壁巧能圖花竟因酥  
點砧爭以練鋪未燁調鼎鵠全混蔽旒珠懷昔  
餐衣絮誰今食黍腴善歌知寡和釀飲遂成醕  
衆筆排堅陣多多困老夫

次韻三和景仁對雪

北度龍沙遠南來狗犬無玉階三尺峻粉壁萬  
重糊獸餒行迷穴禽寒立並枯長川平界限大  
屋竦稜觚稍見蓬萊闕初張雲霧圖受降虜甲

積罷獵羽毛鋪被褐思懷寶游都學賣珠車皆  
陳漆轡人盡得瓊腴縞已贈吳札席將開漢醕  
鳳池批詔手特地逞工夫

次韻和末叔新歲書事見寄

尖風細細欲穿簾殘雪微銷凍結簷蓋裏醇醪  
無限滿鏡中白髮不知添妍童喜舞開羅幕小  
吏愁嘶入硯蟾幸得從公持直筆定應無復歎  
虀鹽

送辛都官有終知鄂州

衣上大梁雪門前武昌車使君行有期將逢鳥  
隼旗車動自輾輓旗輕自舒舒去都越千里城  
在江上居黃鶴有高樓樓頭挂蟾蜍下見鸞鷁  
洲葭茁可以蒞爲弔禰處士沉蹤異三閭憶昔  
我仲父五馬來躊躇願君訪舊跡因報八行書

次韻王景彝正月十六夜省宿過景靈

街

宮街不閉東城月圓影纔虧夜色春自躍金羈  
來宿省從他錦帳欲誇人燈光遠近疑爭晝歌

韻高低競起塵我老都無游樂意似君清枕睡  
侵晨

送韓王汝太傅知洋州三首

函關見殘雪褒谷聞春禽禽響通朱輪馬嘶入  
青林花明亂石路雲抱寒泉岑天外漢江來城  
下漁網沉庖供縮項鱸坐使宮娥斟農桑不須  
教古俗自通今

渭入秦宮古褒分蜀道難泉聲春雨後月色曉  
程寒蠶浴桑牙短禽啼杏萼丹從來稱召杜民

俗在君安

春風東來幾萬里相送入關如有情灞陵原邊  
柳條暗咸陽橋畔桃花明自古恨別此兩處十  
千美酒瑠璃傾日落未落車馬動子規滴血壯  
士驚行哉使君負膽氣蜀道雖險心常輕是時  
門前大桐樹爛漫紫萼啼流鶯弟兄同懷不可  
見應亦夢覺嗟遠程太白山前一尺雨桑下問  
蠶田問耕郡城夜開百姓喜喜喜從迢遞壺漿迎

李廷老祠部寄荆柑子

踏雪衝風馳小吏帶霜連葉寄黃柑擗包欲咀  
才全動舉盞逢衰酒易酣書尾自題知遠意筆  
頭親咎馱多談故人莫覓新詩卷都似嵇康七  
不堪

韻語荅末叔內翰

世人作肥字正如論饅頭厚皮雖然佳俗物已  
可羞字恣歎中絕今將五十秋近日稍稍貴追  
蹤慕前流曾未三數人得與古昔儔古人皆能  
書獨其賢者畱後世不推此但務於書求不知

前日工隨紙泯已休顏書苟不佳世豈不寶收  
設如楊疑式言且直節修又若李廷中清慎實  
罕侔乃知愛其書兼取爲人優豈書能存久賢  
哲人馬廋非賢必能此惟賢乃爲尤其餘皆泯  
泯死去同馬牛大尹歐陽公昨日喜疾瘳信筆  
寫此語謂可忘病憂黃昏走小校寄我東郭陬  
綴之輒成篇聊以助吟謳

次韻和韓子華內翰於李右丞家移紅  
薇子種學士院

紅薇花樹小扶踈春種秋芳賞愛餘丞相舊園  
移帶土侍臣清暑看臨除薄膚痒不勝輕爪嫩  
榦生宜近禁廬此地結根千萬歲聯華榮莫比  
茅茹

次韻和吳長文舍人卽事見寄

莫問春風有後先但逢佳處去揚鞭桃花洞遠  
迷應久杏樹壇荒迹自傳放與曉寒能幾許卽  
看芳意不多偏古來間氣爭強弱謾費黃金拋  
楚權

次韻和長文社日禡祀出城

曉出春風已擺條  
應逢社伯馬蹄驕  
壇邊宿雨微  
霑麥水上殘冰壅  
過橋燕子飛來依約近  
鴈行歸去試教調  
北扉西掖多才思  
相與飄飄在沈寥

次韻和長文禡祀郊外見寄并呈韓子

華

鶉鴝知雨在桑中  
雄逐鷗飛自不同  
胡粉未生輕蝶白  
燕脂先綻野櫻紅  
高高樹裏鞦韆月  
獵

獵墻頭蓓蕾風曉下祠壇多寄詠衣冠方侍大明宮

送馬行之都官

昭亭山下送君時不畏西行劔棧危  
竿馬跨來身更健吳船乘去計非遲  
錢塘湖上尋雲屋巾子峰前種槿籬  
此趣已高天下士不須功業似鴟夷

和王景彝詠薜荔

植物有薜荔足物有蜥蜴固知不同類亦各善

綠壁根隨枝蔓生葉侵苔蘚碧後凋雖可嘉勁  
挺異松栢

和江鄰幾省中賞小桃

年年二月賣花天唯有小桃偏占先初見嫩紅  
無不喜終知俗艷幾多妍鄰翁已折郊園裏貴  
客爭誇粉署邊可惜工夫吟向此會須畱醉牡  
丹前

長歌行

世人何惡死死必勝於生勞勞塵土中役役歲

月更大寒求以暝大暑求以清維餒求以饑維  
渴求以觥其少慾所惑其老病所嬰富貴拘法  
律貧賤畏笞榜生旣若此苦死當一切平釋子  
外形骸道士完髓精二皆趨死徒足以見其情  
遺形得極樂昇僊上玉京是乃等爲死安有蛻  
骨輕日中不見影陽魂與鬼并莊周謂之息漏  
泄理甚明仲尼曰焉知不使人道傾此論吾得  
之曷要世間行

依韻和長文紫微春雨二首

年年潑火雨苦作清明寒梨花猶半綻塘水已  
迷漫愁看日更永冷漏夜未闌酒沫起玉盞燭  
淚生銅盤春衣向來脫帶眼斗覺寬試問彼俠  
少何處跨金鞍

春雨固多喜雖多安得愁既能勒花苞又解滋  
耕疇池添痕痕漲渠有細細流不同離婦怨一  
落不可收定知矜有年豈似斗粟賙西掖吳夫  
子吟觀意遲留正聲齊雅頌高論等陽秋我慙  
才甚薄難繼東山謳

送滕寺丞歸蘇州

驅車入蜀時有弟毋不往畱婦侍毋傍以子囑  
婦養昨得閤門書婦子死泉壤此心那得安弃  
官提轡鞅東馳三千里驚馬求吳槩吳槩速如  
飛歸來拜堂上堂前去時樹已覺枝條長豈無  
懷抱感爲壽酌春醴

次韻和疇永叔

春候倏已和林上鳴鳥譁前日是清明驟雨霑  
梨花初聞結客游愛此物景嘉歌舞未終宴夕

暮各興嗟所嗟歸路暗嘶馬自知家公家八九  
姝鬢髮如盤鴉朱脣白玉膚參年始破瓜幾日  
苦霖霪當道跳魚蝦閉門飲濁醪鞦韆繫樹丫  
群姝莫要劇爲公歌啞啞公當是日醉歡適不  
可涯孔氏有高第內自戰紛華我公豈其然秉  
直異蓬麻果效歸田去願從招轅車

次韻和江鄰幾送客回同過金明池

送別西亭車馬塵天池回傍欲迷津盡船龍尾  
何時發丹杏梢頭漏泄春

風光猶未老於人  
獸口泉聲瀉碧津  
一洗塵襟無俗慮  
柳條開眼共看春

宛陵先生集卷第十九

開化圖書館  
Wenhua Library

開化圖書館

Kaichua library

開化圖書館

Kaichua library


夏

開化圖書館

Kaishwa Library

開化圖書館

kaikwa library



宛陵先生集

開化圖書館  
Kashira library

四

開化圖書

Kaishwa Library



Inches 1 2 3 4 5 6 7

Centimetres 1 2 3 4 5 6 7 8 9 10 11 12 13 14 15 16 17

**TIFFEN** Color Control Patches

© The Tiffen Company, 2007

Blue Cyan Green Yellow Red Magenta White 3/Color